





謝康樂集

詩

述祖德詩二首

達人貴自我高情屬天雲兼抱濟物性而不纓  
垢氛段生藩魏國展季救魯人弦高犒晉師仲  
連却秦軍臨組乍不綵對珪寧肯分惠物辭所  
賞勵志故絕人茗茗歷千載遥遥播清塵清塵  
竟誰嗣明哲時經綸委講綴道論改服康世屯  
屯難既云康尊主隆斯民  
中原昔喪亂喪亂豈解已崩騰永嘉末逼迫太



元始河外無反正江介有蹠圯萬邦咸振懾橫  
流賴君子拯溺由道情龕暴資神理秦趙欣來  
蘇燕魏遲文軌賢相謝世運遠圖因事止高揖  
七州外拂衣五湖裏隨山疏濬潭傍岩藝枌梓  
遺情捨塵物貞觀丘壑美

九日從宋公戲馬臺集送孔令詩一首

季秋邊朔苦旅鴈違霜雪淒淒陽卉腓皎皎寒  
潭絜良辰感聖心雲旗興暮節鳴葭戾朱宮蘭  
卮獻時哲餞宴光有孚和樂信所缺在宥天下  
理吹萬群方悅歸客遂海隅脫冠謝朝列弭棹  
簿柱渚指景待樂闕河流有急瀾浮驂無緩轍  
豈伊川途念宿心愧將別彼美丘園道喟焉傷  
薄劣

鄰里相送方山詩一首

祗役出皇邑指期慙甌越解纜及流潮懷舊不  
能發析析就衰林皎皎明秋月含情易爲盈遇  
物難可歇積痾謝生慮寡欲罕所闕資此永幽  
棲豈伊年歲別各勉日新志音塵慰寂蔑

從游京口北固應詔一首

玉璽戒誠信黃屋示崇高事爲名教用道以神



理超昔聞汾水游今見塵外鏡鳴笳發春渚稅  
鑾登山椒張組眺倒景列筵矚歸潮遠巖映蘭  
薄白日麗江臯原隰萬綠柳墟囿散紅桃皇心  
美陽澤萬泉咸光昭顧已枉維繫撫志慙場苗  
工拙各所宜終以及林巢曾是縈舊想覽物奏  
長謠

晚出西射堂一首

步出西掖門遙望城西岑連障疊巘嶸青翠杳  
深沉曉霜楓葉丹夕曛嵐氣陰節往感不淺感  
來念已深羈雌戀舊侶迷鳥懷故林含情尚勞  
愛如何離賞心撫鏡華緇髻攬帶緩促衿安排  
徒空言幽獨賴鳴琴

登池上樓一首

潛虬媚幽姿飛鴻響遠音薄霄愧雲浮栖川作  
淵沉進德智所拙退耕力不任徇祿反窮海臥  
病對空林衾枕昧節候褰開暫窺臨傾耳聆波  
瀾舉目眺嶇嶮初景革緒風新陽改故陰池塘  
生春草園柳變鳴禽祁祁傷豳歌萋萋感楚吟  
索居易永久離群難處心持操豈獨古無悶徵  
在今



遊南亭一首

時竟夕澄霽雲歸日西馳密林含餘清遠峰隱  
半規久痲昏墊苦旅館眺郊岐澤蘭漸被徑芙  
蓉始發池未厭青春好已觀朱明移感感物  
歎星星白髮垂藥餌情所止衰疾忽在斯逝將  
候秋水息景偃舊崖我志誰與亮賞心惟良知  
遊赤石進帆海一首

首夏猶清和芳草亦未歇水宿淹晨暮陰霞屢  
興沒周覽倦瀛壖况乃陵窮髮川后時安流天  
吳靜不發揚帆采石華挂席拾海月溟漲無端

倪虛舟有超越仲連輕齋組子牟眷魏闕矜名  
道不足適已物可忽請附任公言終然謝天伐

石壁精舍還湖中一首

昏旦變氣候山水含清暉清暉能娛人游子澹  
忘歸出谷日尚早入舟陽已微林壑歛暝色雲  
霞收夕霏芰荷迭映蔚蒲稗相因依披拂趨南  
徑愉悅偃東扉慮澹物自輕意愜理無違寄言  
攝生客試用此道推

登石門最高頂一首

晨策尋絕壁夕息在山棲疏峰枕高館對嶺臨



迴谿長林羅戶庭積石擁基階連巖覺路塞密  
竹使徑迷來人忘新術去子惑故蹊活活夕流  
駛噉噉夜猿啼沉冥豈別理守道自不攜心契  
九秋幹目翫三春蕙居常以待終處順故安排  
惜無同懷客共登青雲梯

於南山往北山經湖中瞻眺一首

朝旦發陽崖景落憇陰峰舍舟眺迴渚停策倚  
茂松側徑旣窈窕環洲亦玲瓏俛視喬木杪仰  
聆大壑淙石橫水分流林密蹊絕蹤解作竟何  
感生長皆丰容初篁苞綠籜新蒲含紫茸海鷗  
戲春岸天雞弄和風撫化心無厭覽物眷彌重  
不惜去人遠但恨莫與同孤游非情嘆賞廢理  
誰通

從斤竹澗越嶺溪行一首

猿鳴誠知曙谷幽光未顯巖下雲方合花上露  
猶泫透迤傍隈隩迢遞陟陁峴過澗旣厲急登  
棧亦凌緬川渚屢逕復乘流翫迴轉蘋萍泛沈  
深菰蒲冒清淺企石挹飛泉攀林摘葉卷想見  
山阿人薜蘿若在眼握蘭勤徒結折麻心莫展  
情用賞為美事昧竟誰辨觀此遺物慮一悟得



所遣

廬陵王墓下一首

曉月發雲陽落日次朱方含悽泛廣川灑淚眺  
連岡眷言懷君子沈痛切中腸道消結憤懣運  
開申悲涼神期恒若存德音初不忘徂謝易永  
久松柏森已行延州協心許楚老惜蘭芳解劍  
竟何以撫墳徒自傷平生疑若人通蔽互相妨  
理感深情慟定非識所將腕促良可哀天枉特  
兼常一隨往化滅安用空名揚舉聲泣已瀝長  
歎不成章

還舊園作見顏范二中書一首

辭滿豈多秩謝病不待年偶與張邴合又欲還  
東山聖靈昔廻眷微尚不及宣何意衝飈激烈  
火縱炎煙焚玉發崑峰餘燎逐見遷投沙理既  
迫如叩願亦愆長與歡愛別永絕平生緣浮舟  
千仞壑總轡萬尋巔流沫不足險石林豈爲艱  
閩中安可處日夜念歸旋事蹟兩如直心慙三  
避賢託身青雲上棲巖挹飛泉盛明盪氛昏貞  
休康屯遭殊方感成貧微物豫采甄感深操不  
固質弱易版纏曾是反昔園語枉實款然曩基



即先築故池不更穿果木有舊行壤石無遠延  
雖非休憩地聊取永日間衛生自有經息陰謝  
所牽夫子照情素探懷授往篇

登臨海嶠與從弟惠連詩一首

抄秋尋遠山山遠行不近與子別山阿含酸赴  
脩眇中流袂就判欲去情不忍顧望脰未惜汀  
曲舟已隱隱汀絕望舟驚棹逾驚流欲抑一生  
歡并奔千里游日落當棲薄繫纜臨江樓豈惟  
夕情歛憶爾共淹留淹留昔時歡復增今日嘆  
茲情已分慮况乃協悲端秋泉鳴北澗哀猿響

南巒戚戚新別心悽悽久念攢攢念攻別心旦  
發青谿陰暝投剡中宿明登天姥岑高高入雲  
霓還期那可尋倘遇浮丘公長絕子徽音

酬從弟惠連一首

寢瘵謝人徒滅迹入雲峯岩壑寓耳目歡愛隔  
音容永絕賞心望長懷莫與同末路值令弟開  
顏披心胸心胸既云披意得咸在斯陵澗尋我  
室散帙問所知夕慮曉月流朝忌曛日馳悟對  
無厭歇聚散成分離分離別西川迴景歸東山  
別時悲已甚別後情更延傾想遲嘉音果枉濟



江篇辛勤風波事款曲洲渚言洲渚既淹時風  
波子行遲務協華京想詎存空谷期猶復惠來  
章祇足攬余思儻若果歸言共陶暮春時暮春  
雖未交仲春善遊遨山桃發紅萼野蕨漸紫苞  
嚶鳴已悅豫幽居猶鬱陶夢寐佇歸舟釋我吝  
與勞

初發都詩一首

述職期闌暑理棹變金素秋岸澄夕陰火旻團  
朝露辛苦誰爲情游子值頽暮愛似蒞念昔久  
敬曾存故如何懷土心持此謝遠度李牧愧長

袖卻克慙躑步良時不見遺醜狀不成惡曰余  
亦支離依方早有慕生幸休明世親蒙英達顧  
空班趙氏璧徒乖魏王瓠從來漸二紀始得傍  
歸路將窮山海迹永絕賞心晤

過始寧墅一首

束髮懷耿介逐物遂推遷違志似如昨二紀及  
茲年緇磷謝清曠疲薊慚貞堅拙疾相倚薄還  
得靜者便剖竹守滄海枉帆過舊山山行窮登  
頓小涉盡洄泓巖峭嶺重疊洲縈渚連緜白雲  
抱幽石綠篠媚清漣葺宇臨迴江築觀基曾巔



揮手告鄉曲三載期歸旋且爲樹枿無令孤  
願言

富春渚一首

宵濟漁浦潭且及富春郭定山緬雲霧赤亭無  
淹薄溯流觸驚急臨圻阻參錯亮乏伯昏分險  
過呂梁壑洊至宜便習兼山貴止託平生協幽  
期淪躓困微弱又露干祿請翻始果遠諾宿心  
漸申寫萬事俱零落懷抱旣昭曠外物徒龍蠖  
羈心積秋晨晨積展游眺孤客傷逝湍徒旅苦

七里瀨一首

奔峭石淺水潺湲日落山照曜荒林紛沃若哀  
禽相叫嘯遭物悼遷斥存其得要妙旣秉上皇  
情豈屑末代誚日觀嚴子瀨想屬任公釣誰謂  
古今殊異代可同調

登江中孤嶼一首

江南倦歷覽江北曠周旋懷新道轉迥尋異景  
不延亂流趨孤嶼孤嶼媚中川雲日相輝映空  
水共澄鮮表靈物莫賞蘊真誰爲傳想象崑山  
姿緬邈區中緣始信安期術得盡養生年

初去郡一首



彭薛裁知恥貢公未遺榮或可優貪競豈足稱  
達生伊予秉微尚拙訥謝浮名廬園當栖巖卑  
位代躬耕顧已雖自許心迹猶未并無庸妨周  
任有疾象長卿畢娶類尚子薄游似邴生恭承  
古人意俶裝返柴荆牽絲及元興解龜在景平  
負心二十載於今廢將迎理棹遄還朝遵渚鶩  
脩垆遡谿終水涉登嶺始山行野曠沙岸淨天  
高秋月明憇石挹飛泉攀林蹇落英戰勝矐者  
肥止鑿流歸停即是義唐化獲我擊壤情

初發石首城一首

白圭尚可磨斯言易爲緇雖抱中孚爻猶勞貝  
錦詩寸心若不亮微命察如絲日月垂光景成  
貸遂無茲出宿薄京畿晨裝搏曾颺重經平生  
別再與朋知辭故山日已遠風波豈還時迢迢  
萬里帆茫茫終何之游當羅浮行息必廬霍期  
越海陵三山游湘歷九疑欽聖若旦暮懷賢亦  
悽其皎皎明發心不爲歲寒欺

道路憶山中一首

採菱調易急江南歌不緩楚人心昔絕越客腸  
今斷斷絕雖殊念俱爲歸慮歎存鄉爾思積憶



山我憤懣追尋棲息時偃卧任縱誕得性非外  
求自己爲誰纂不怨秋夕長恒苦夏日短濯流  
激浮湍息陰倚密竿故懷叵新歡含悲忘春暖  
悽悽明月吹惻惻廣陵散殷勤訴危柱慷慨命  
促管

入彭蠡湖口作一首

客游倦水宿風潮難具論洲島驟迴合圻岸屢  
崩奔乘月聽哀狖浥露馥芳蓀春晚綠野秀巖  
高白雲屯千念集日夜萬感盈朝昏攀崖照石  
鏡牽葉入松門三江事多往九派理空存靈物  
吝珍怪異人祕精蒐金膏滅明光水碧輟流温  
徒作千里曲絃絕念彌敦

入華子岡是麻源第三谷一首

南州實炎德桂樹陵寒山銅陵映碧澗石磴瀉  
紅泉旣枉隱淪客亦棲肥遁賢險徑無測度天  
路非術阡遂登群峯首邈若升雲煙羽人絕彷彿  
丹丘徒空筌圖牒復摩滅碑版誰聞傳莫辨  
百代後安知千載前且申獨往意乘月弄潺湲  
恒充俄頃用豈爲古今然

樂府詩一首會吟行



六引緩清唱三調佇繁音列筵皆靜寂咸共聆  
會吟會吟自有初請從文命敷敷績壺翼始刊  
木至江汜列宿炳天文負海橫地理連峯競千  
仞背流各百里漉池漑粳稻輕雲暖松杞兩京  
槐佳麗三都豈能似層臺指中天高墉積崇雉  
飛燕躍廣途鷓首戲清沚肆呈窈窕客路曜便  
娟子自來彌世代賢達不可紀勾踐善廢興越  
叟識行止范蠡出江湖梅福入城市東方就旅  
逸梁鴻去桑梓牽綴書土風辭殫意未已

南樓中望所遲客一首

杳杳日西頽漫漫長路迫登樓爲誰思臨江遲  
來客與我別所期期在三五夕圓景早已滿佳  
人猶未適即事怨睽攜感物方悽戚孟夏非長  
夜晦明如歲隔瑤華未堪折蘭若已屢摘路阻  
莫贈問云何慰離析搔首訪行人引領翼良覲

齋中讀書一首

昔余游京華未嘗廢丘壑矧乃歸山川心跡雙  
寂漠虛館絕諍訟空庭來鳥雀臥疾豐暇豫翰  
墨時閒作懷抱觀古今寢食展戲謔既笑沮溺  
苦又哂子雲閣執戟亦已疲畊稼豈云樂萬事



難並歡達生幸可託

田南樹園激流植援一首

樵隱俱在山南來事不同不同非一事養痾丘  
園中園中屏氛雜清曠招遠風卜室倚北阜啓  
扉面南江激澗代汲井插槿當列墉群水旣羅  
戶衆山亦當窻靡也趨下岫迢遞瞰高峰寡欲  
不期勞即事罕人功唯開蔣生徑永懷求羊踪  
賞心不可忘妙善異皆同

石門新營所住四面高山迴磎石瀨茂

林脩竹詩一首

躋險築幽居披雲卧石門苔滑誰能步葛弱豈  
可捫嫋嫋秋風過萋萋春艸繁美人遊不還佳  
期何由敦芳塵凝瑶席清醕滿金罇洞庭空波  
瀾桂枝徒攀翻結念屬霄漢孤景莫與援俯濯  
石下潭仰看條上猿早聞夕颿急晚見朝日暎  
崖傾光難留林深響易奔感往慮有復理來情  
無存庶持乘日車得以慰營魂匪爲衆人說翼  
與智者論

擬魏太子鄴中集詩

建安末余時在鄴宮朝遊夕讌究歡愉之極



天下良辰美景賞心樂事四者難并今昆弟  
友朋二三諸彦備盡之矣古來此娛書籍未  
見何者楚襄王時有宋玉唐景梁孝王時有  
鄒枚嚴馬游者美矣而其主不文漢武帝時  
徐樂諸才備應對之能而雄猜多忌豈獲晤  
言之適不誣方將庶必賢於今日爾歲月如  
流零落將盡撰文懷人感往增愴其辭曰

魏太子

百川赴巨海衆星環北辰照灼爛霄漢遙裔起  
長津天地中橫潰家皇拯生民區宇旣滌蕩群  
英必來臻忝此欽賢性由来常懷仁况值衆君  
子傾心隆日新論物靡浮說析理實敷陳羅縷  
豈闕辭窈窕究天人澄觴滿金壘連榻設華茵  
急絃動飛聽清歌拂梁塵莫言相遇易此歡信  
可珍

王粲

家本秦川貴公子孫遭亂流寓自傷情多  
幽厲昔崩亂桓靈今版蕩伊洛旣燎煙函嶠沒  
無象整裝辭秦川林馬赴楚壤沮漳自可美客  
心非外獎常歎詩人言式微何由往上宰奉皇



靈侯伯咸宗長雲騎亂漢南宛郢皆掃盪排霧  
屬盛明披雲對清朗慶泰欲重疊公子特先賞  
不謂息肩願一旦值明兩並載遊鄴京方舟况  
河廣綢繆清讌娛寂寥梁棟嚮旣作長夜飲豈  
顧乘日養

陳琳

袁本初書記之士故叙喪亂事多

皇漢逢屯遭天下達氛慝董氏淪關西袁家擁  
河北單人易周章窘身就羈勒豈意事乖已永  
懷戀故國相公實勤王信能定螫賊復覩東都  
輝重見漢朝則餘生幸已多矧迺值明德愛客  
不告疲飲讌遺景容夜聽極星闌朝遊窮曠累  
哀哇動梁埃急觴盪幽默且盡一日娛莫知古  
來惑

徐幹

少無宦情有箕穎之心事故仕世多素辭

伊昔家臨淄提攜弄秦瑟置酒飲膠東淹留憇  
高密此歡謂可終外物始嘆畢搖盪箕濮情窮  
年迫憂慄末塗幸休明棲集建薄質已免負薪  
苦乃游椒蘭室清論事究萬美話信非一行觴



奏悲歌永夜繼白日華屋非蓬居時髦豈余匹  
中欺顧昔心悵焉若有失

劉楨

卓犖偏人而文最有氣所得頗經奇

貧居晏里閑少小長東平河充當衝要淪漂薄  
許京廣川無逆流招納厠群英比度黎陽津南  
登紀郢城既覽古今事頗識治亂情歡友相解  
達敷奏究平生矧荷明哲顧知深覺命輕朝遊  
牛羊下暮坐括搗鳴終歲非一日傳卮弄新聲  
辰事既難諧歡願如今并唯羨肅肅翰續紛戾

高冥

應瑒

汝穎之士流離世故頗有飄薄之歎

嗷嗷雲中鴈舞翮自委羽求涼弱水湄違寒長  
沙渚顧我涼川時緩步集穎許一旦逢世難淪  
薄恒羈旅天下昔未定託身早得所官渡厠一  
卒烏林預艱阻晚節值衆賢會同庇天宇列坐  
蔭華棖金樽盈清醕始奏延露曲繼以闌夕語  
調笑輒酬答嘲謔非慙沮傾軀無遺慮在心良  
已叙



阮瑀

管書記之任故有優渥之言  
河洲多沙塵風悲黃雲起金羈相馳逐聯翩何  
窮已慶雲惠優渥微薄攀多士念昔渤海時南  
皮戲清泚今復河曲游鳴篴汎蘭汜躡步陵丹  
梯並坐侍君子妍譚既愉心哀音信睦耳傾酤  
係芳醕酌言豈終始自從食萍來唯  
今日美

平原侯植

公子不及世事但羨遨遊然頗有憂生之嗟  
朝遊登鳳閣日暮集華沼傾柯引弱枝攀條摘

惠草徒倚窮騁望目極盡所討西顧太行山北  
眺邯鄲道平衢脩且直白楊信裊裊副君命飲  
讌歡娛寫懷抱良遊匪晝夜豈云晚與早衆賓  
悉精妙清辭蘭浦藻哀音下迴鵠餘哇徹清昊  
中山不知醉飲德方覺飽願以黃髮期養生念  
將老

謝康樂集 終



謝惠連集

泛湖歸出樓中翫月一首

日落泛澄瀛星羅遊輕橈  
 憩樹面曲汜臨流對  
 迴潮輟策共駢筵並坐相招要  
 哀鴻鳴沙渚悲  
 猿響山椒亭亭映江月  
 颺颺出谷颯斐斐氣窳  
 焯泫泫露盈條近矚祛幽蘊  
 遠視盪諠颯晤言  
 不知罷從夕至清朝

秋懷詩一首

平生無志意少小嬰憂患  
 如何乘苦心矧復值  
 秋晏皎皎天月明奕奕河宿爛  
 蕭瑟舍風蟬寥



喚度雲鴈寒商動清閨孤燈暖幽慢耿介繁慮  
積展轉長宵半夷險難預謀倚伏昧前算雖好  
相如達不同長卿慢頗悅鄭生偃無取白衣宦  
未知古人心且從性所翫賓至可命觴朋來當  
深翰高臺驟登踐清波時陵亂頽冕不再圓傾  
羲無兩且金石終銷毀丹青斲彫煥各勉玄髮  
歡無貽白首歎因歌遂成賦聊用布親串

西陵遇風獻康樂一首

我行指孟春春仲尚未發趣途遠有期念離情  
無歎成裝候良辰漾舟陶嘉月瞻塗意少悰還

顧情多闕哲兄感此別相送越垞林飲餞野亭  
館分袂澄湖陰悽悽留子言眷眷浮客心迴塘  
隱艫棹遠望絕形音靡靡即長路戚戚抱遙悲  
悲遙但自弭路長當問誰行行道轉遠去去情  
彌遲昨發浦陽汭今宿浙江湄屯雲蔽曾嶺礮  
風湧飛流零雨潤攢澤落雪灑林丘浮氛晦崖  
巘積素或原疇曲汜薄停依通川絕行舟臨津  
不得濟佇楫阻風波蕭條洲渚際氣色少諧和  
西矚興游歎東睇起淒歌積憤成疾疢無萱將  
如何



七月七日夜詠牛女詩一首

落日隱欄楹外月照簾櫳團團滿槩露析析振  
條風蹠足循廣除瞬目曠曾穹雲漢有靈匹彌  
年闕相從遐川阻暱愛脩渚曠清容弄杼不成  
藻雙轡驚前蹤昔離秋已兩今聚夕無雙傾河  
易迴幹款情難久悰沃若靈駕旋寂寥雲幄空  
留情顧華寢遙心逐奔龍沈吟爲爾感情深意  
彌重

擣衣詩一首

衡紀無淹度晷運倏如催白露滋園菊秋風落  
庭槐肅肅莎雞羽烈烈寒蟬啼夕陰結空幕宵  
月皓中閨美人戒裳服端飾相招攜簪玉出北  
房鳴金步南階欄高砧響發楹長杵聲哀微芳  
起兩袖輕汗染雙題紈素既已成君子行未歸  
裁用笥中刀縫爲萬里衣盈篋自余手幽絨俟  
君開腰帶准疇昔不知今是非



謝宣城集卷一

酬德賦

并序

右衛沈侯以冠世偉才眷予以國士以建武二  
年予將南牧見贈五言予時病旣以不堪蒞職  
又不獲復詩四年予忝役朱方又致一首迫東  
偏寇亂良無暇日其夏還京師且事讌言未遑  
篇章之思沈侯之麗藻天逸固難以報章且欲  
申之賦頌得其盡體物之旨詩不云乎無言不  
酬無德不報言旣未敢爲酬然所報者寡于德  
耳故稱之肅德賦其辭曰



嗟夫四時游之代序六龍驚而不息輕蓋靡于  
駿奔玉衡勞于拊翼嗟歲晏之甚歡曾陰默以  
悽惻玄武伏於重介宛虹潛以自匿覽其物之  
用舍相羣芳之動植弔悴軀於華省理衣簪而  
自敕思披文而信道散奮懣於胸臆嗟民生之  
知用知莫深於知己彼知己之爲深信懷之其  
何已牽弱葛之蔓延寄陵風於松杞指曲蓬之  
直達固有憑於原臬彼排虛與躡實又相鳴於  
林泚興伐木於友生詠承筐於君子矧景行之  
在斯方寄言于同耻求相仁于積習寓神心于

名理惟敦特之旅歲實興齊之二六奉武運之  
方昌覩休風之未淑龍樓儼而洞開梁邱煥其  
重複君奉筆於帝儲我曳裾於皇穆藉風雲之  
化景申遊好於蘭菊結德音而爲佩帶芳猷而  
爲服援雅範以自綏懿前修之所 昔仲宣之  
發穎寔中郎之倒屣及士衡之籍甚託壯武之  
高義有杞梓之貞心協丹采之輝被伊吾人之  
陋薄雖黼藻之何寘惟風雅之未變知雲綱之  
不廓譬層棟之將傾必華榱之先落翳明離以  
上賓屬傳體於織萼周二輝而分崩擠九鼎於



重壑雖魚鳥之欲安駭風川而迴薄微天道之  
布新嗟員首其焉託予窘迹以多媿塊離尤而  
獨處君紆組於名邦貽話言於洲渚悵分手於  
東西望徂舟而延佇慮古今之爲隔豈山川之  
云阻賴先德之龍興奉英靈之電舉事紫泥之  
密勿腰青綬而容與沾後惠以竭來音卒獲其  
笑語我艤舟以命徒將泊徂於南夏旣勗予以  
烟戒又引之以風雅若笙簧之在聽雖舒憂而  
可假若疢病於章濱思繼歌而莫寫恩靈降之  
未已奉京粉而作傳臨邦途之永陌懷予馬於

騏驎望平津而出宿登崇岡而興賦顧飛憶之  
南迴引行鑣而東驅何瓌才之博侈申贈辭於  
萱樹指代匠而切偲比治素而引喻方含毫而  
報章迫紛埃之東驚釋末位以言歸忽乘驛以  
南赴連篇章之莫訓欲寄言於徃句類鍛翮之  
難矯似洞源之不注意搔搔以杼柚竟營營而  
馳騫爾腰戟於戎禁我拂劍於郎闈願同車以  
日夜城望昏而掩扉時遊盤以未極睠落景之  
徂輝若清顏之倏忽吝歡賞之多違排重闕一作  
闕而休告知南館之有依驂職門以右轉僕望



路其如歸忘清漏之不緩惜曉露之方晞聞夫  
君之東守地隱蓄而懷僊登金華之問道得石  
室之名篇悟寰中之迫脅欲輕舉而舍旃離寵  
辱於毀譽去天代於腥膻忽攜手以上征躋中  
皇之脩迥巾帝車一作連之廣軾棹河舟一作洲之  
輕艇歷星街之熠燿浮天潢之澗溟機九轉於  
玉漿練七明於神鼎吹萬化而不喧度千春之  
可並齊天地於倏忽安事人間之紆綈哉

思歸賦

并序

夫鑒之積也無厚而納窮神之照心之徑也有

域而懷重淵之深余少而薄遊身防方思俄  
然萬里晚自省諒非一塗何則此後闕

余菲薄以固陋受恩靈而不訾施鍾黃之沃若  
剖金符之陸離舟未濟而河廣途方遙而馬疲  
忽中寢而念厲魂申旦而九移昔受教於君子  
逢知己之隆盼被名立之羽儀沾宦成之藻綯  
羌服義而不怠豈臨岐而喻變勢方迅於轉圓  
理好旋於奔電援弱葛而能升踐重岡而不眩  
信禔福之非已寧悔禍其如見大明廓以高臨  
吹萬忻而同悅跨神臯之沃衍奉英藩之睿智



承此屋

一作

之隆化踵芳塵之餘烈懷齷齪之

褊心無夸毗之誕節竟伊鬱而不怡賴遐討於

先哲紛吾生之遊蕩彌一紀而歷茲自下車於

江海涉青春於是時矐崇芒而引領望大夏而

長思雖曲街之委陋猶寤寐而見之况神交而

通夢眇河漢於佳期爾乃眷言薄暮南眺悠然

將整歸轡願受一廛考華城之直陌相洛浦之

迴阡連飛甍於故友接閭館以懷僊臨南塲以

藝藿寄北池而采蓮睇微莖之霏霏望水葉之

田田乃翦山木不日爲功非輪非奩去斲去龔

夜索綯而繚繞旦乘屋而芘芘竹櫺踣區而經

北繩閉窈窕以臨東布茵蕭於踈棹織莢亂於

迴櫳于是籬插芳槿門拂長楊園桃春發窻竹

夏涼晨露晞而草馥微風起而對香無芬菲以

襲予空旖旎於都房恒離居以歲月庸銷落而

徒傷我聞時命有殖無遷徵事或在求理未甄

譬豐草之區別隨霜露而天延背萱鮮於堂北

尚幽幽而未捐苟外物以能惑亦在應而無騫

况朝霞之采可嚙瓊靡之飾方宣養以虛白之

氣悟以無生之篇豈加璧之贈可動執珪之位



能纏歸來薄暝聊以永年

七夕賦

奉護軍王命作

金祗司矩火曜方流素鐘登御夷律鳴秋未光  
既夕涼雲始浮盈多露之靄靄升明月之悠悠  
步廣階而延膝屬天媛之淹留嗟斯靈之淑景  
招好仇於服廂邁姮娥而擢質凌瑤華而擅芳  
厭白玉以為飾霏丹霞而為裳迴龍駕之容裔  
亂鳳篔之凄鏘騰燭光於西極命二妃於瀟湘  
軾帝車而捐玦凌天津而上翔悵漢渚之夕漲  
忻河廣之既梁臨瑤席而宴語綿含睇而娥揚

嗟蘭夜之難永泣會促而怨長忌織阿之方駕  
吝長庚之末光撫鳴琴而脩况浩安歌而自傷  
歌曰清絃愴兮桂觴酬雲幄靜兮香風浮龍鏡  
蹠兮玉鸞整睽星河兮不可留分雙袂之一斷  
何四氣之可周斯乃嚮像恍惚彷彿幽曖耳之  
無聞目之無績故鐘鼓聞而延予隱白日沉而  
季後對豈形器之所求亦理將其如昧君王壯  
思風飛冲情雲上顧楚詩而縱轡瞻蘭書而競  
爽實研精之多暇聊餘日之駘蕩賦幽靈以去  
惑排視聽而玄往晒陽雲於荆夢賦洛篇於陳



想乃澄心而閒邪庶綢繆於茲賞

高松賦

奉司徒竟陵王教作

閱品物於幽記訪叢育於秘經巡汜林之珍望  
識斯松之最靈提於巖以群茂臨於水而宗生  
豈榆柳之比性指冥椿而等齡若夫脩幹垂陰  
喬柯飛穎望肅肅而既聞即微微而方靜懷風  
音而送聲當月露而留影既芊眠於廣隰亦迢  
遞於孤嶺集九仙之羽儀棲五鳳之光景固松  
木之爲選貫山川而自永爾乃青春受謝雲物  
含明江臯綠草曖然已平紛弱葉而凝照競新

藻而抽英陵翠山而如剪施懸蘿而共輕至於  
星迴窮紀沙鴈相飛同雲映其無色陽光沉而  
滅暉卷風颯之吸歛積霰雪之嚴霏豈彫真於  
歲暮不受令於霜威若乃體同器制質兼上才  
夏書稱其岱畎周篇咏其徂徠乃屈已以弘用  
構大壯於雲臺幸爲玩於君子留神心而顧懷  
君王乃徙讌蘭室解珮明椒寒幽蘭於夕陰詠  
聳幹於琴朝陵高丘以致思御風景而逍遙夷  
徽冕之隆貴懷汾陽之寂寥邈道勝於千禩蘊  
神理而自超夫江海之爲大實涓澮之所歸瞻



衡恒之峻極不讓壤於塵微嗟孤陋之無取幸  
聞道於清微理弱羽於九萬愧不能兮奮飛

杜若賦

奉隨王教作時年  
二十六於坐獻

憑瑤圃而宣游臨水木而延佇柳含色於遠岸  
泉鏡流於枉渚蔭綠竹以淹留藉幽蘭而容與  
覽茲榮之悅茂紛爲芳於清籟觀夫結根擢色  
發曜垂英緣春巒以織布蔭涼潭而影清景奕  
奕以四照枝靡靡而葉傾冒霜蹊以獨藉當春  
郊而逕平舉汀洲以企予懷石泉於幽情嗟中  
巘之織草厠金芝於芳叢夕舒形於溽露旦發

彩於春風承羲陽之光景庶無悲於轉蓬

野鷺賦

并序

有門人斃一野鷺因以爲獻予時命以登俎用  
待賓客客有愛其羽毛請予爲賦其詞曰

夫何羅人之伎巧薦江海之逸禽落摩天之迅  
羽絕歸飛之好音碎文錦之丹臆裂雕綺之翠  
襟孤雛驚以靡翼羈雌叫而莫尋越滄流以遠  
致乃交貿以兼金因閭寺以傳請排邃戶以重  
深貴敷衽以取愛願登俎以甘心

遊後園賦



積芳兮選木幽蘭兮翠竹上蕪蕪以蔭京下田  
田兮被谷左蕙畹兮彌望右芝原兮寫目山霞  
起而削成水積明以經復於是敞風閨之藹藹  
聳雲館之茗茗周步欄以升降對玉堂之沈寥  
追夏德之方暮望秋清之始飈藉宴私而遊行  
時寤語而逍遙爾乃日棲榆柳霞照夕陽孤蟬  
以散去鳥成行惠氣湛兮惟殿肅清陰起兮池  
館涼陳象設兮以玉瑱粉蘭藉兮咀桂漿仰微  
塵兮美無度奉英軌兮式如璋藉高文兮清談  
預含毫兮握芳則觀海兮爲富乃游聖兮知方

臨楚江賦

爰自山南薄暮江潭滔滔積水裊裊霜嵐憂與  
憂兮音無際客之行兮歲已嚴爾乃雲沉四岫  
風蕩中川馳波鬱素駭浪浮天明沙宿莽石路  
相懸於是霧隱行鴈霜眇虛林迢迢落景萬里  
生陰冽攢笳兮極浦弭蘭鷁兮江潯奉玉罇之  
未暮食勝之芳音願光兮秋月庶永照於  
遺簪

擬宋玉風賦

奉司徒  
教作

起日域而搖落集桂宮而送清開翠帳之影藹



響行珮之輕鳴揚淮南之妙舞發齊后妍聲下  
鴻池而蓮散上雀爵一作臺而雲生至於新虹明  
歲高月照秋醉儀廼豫冲想雲浮鄒馬之賓咸  
至申穆之醴已酬朝役登樓之詠夕引小山之  
謳厭朱邱之沉邃思輕舉而遠游驪驪之馬魚  
躍飄鑿車而水流此乃宋王之盛風也若夫子  
雲寂寞叔夜高張煙霞潤色荃蕙結芳咽澗幽  
而泉冽入山戶而松涼眇神王於丘壑獨起遠  
於孤觴斯則幽人之風也

樂歌

雩祭歌八首

迎神

清明暢禮樂新候龍景選貞辰其陽律亢陰晷  
伏耕下土荐種稔其宸儀警王度宣瞻雲漢望  
旻天其張盛樂奏雲儷集五精延帝祖其雲有  
諷崇有秩秬鬯芬圭瓚苾其靈之來帝闔開車  
煜燿吹徘徊其停龍轆徧觀此凍雨飛祥雲靡  
入其壇可臨奠可歆對疇社鑒皇心

右八章章四句句三言

世祖武皇帝



濬哲維祖長發其武帝出自震重光御寓七德  
攸宣九疇咸叙靜難荆衡疑威蠶浦其昧旦不  
承夕惕刑政化一車書德馨染盛昭星夜景非  
雲曉慶衢室成陰璧水如鏡其禮充玉帛樂被  
匏絃於鑠在詠陟配於天自宮徂兆靡愛牲牲  
我將我享永祚豐年

右三章章八句句四言

青帝

營翼日鳥殷霄凝冰泮玄蟄昭其景陽陽風習  
習女夷歌東皇集其奠春酒秉青珪命田租渥

群黎

右三章章四句句三言

赤帝

惟此夏德德恢台兩龍在御炎精來其火景方  
中南譌秩靡草云黃含桃實其族雲翁鬱温風  
扇興雨祁祁黍苗遍

右三章章二句句七言

黃帝

稟火自高明毓金挺剛克涼燠資成化群芳載  
厚德其陽季勾萌達炎徂溽暑融商暮百工止



歲極凌陰冲其泉流疏已清原隰甸已平咸言  
祚惟億敦民保高京

右三章章四句句五言

白帝

帝說于允執矩固斯藏百川收潦精景應金方  
其嘉樹離披榆關命賓鳥夜月如霜金風方嫺  
其商陰肅殺萬寶咸亦適勞哉望歲場功異  
可收

右三章章二句句九言

黑帝

白日短玄夜深招搖轉移太陰霜鐘鳴冥陵起  
星迴天月窮紀其聽嚴風來不息望玄雲黝無  
色曾冰裂積羽幽飛雪至天山側其關梁閉方  
不巡合國吹饗蜡賓統微陽究終始百禮洽萬  
祚臻

右三章章四句句六言

送神

敬如在禮將周神之駕不少留其躍龍鑿轉金  
蓋紛上馳雲之外其警七曜詔八神排閭闔渡  
天津其有滄與膚寸積雨冥冥又終夕其俾棲



糧維萬箱皇情暢景命昌

右五章章四句句三言

詩四言

侍宴華光殿曲水奉敕為皇太子作

旁求遂古逖聽鴻名太寶曰位得一為貞朱祿  
叶祉綠字摘英升配同貫進讓殊聲

大橫將屬會昌已命國步中祖宸居膺慶璽劍  
先傳龜玉增映宗堯有緒復禹無競

禮行郊社人神受職寶效山川鱗羽變色玄塞  
北靡丹徼南極浮毳駕風飛一作沫登非陟

能官民秀利建天跼鵠列野營降分區論思

帝則獻納宸樞麟趾方一作公定鵝翼誰濡

西京藹藹東都濟濟秋祓濯流春禊浮醴初吉

云獻上除方啓昔駕陽頻一作穎今帳雲陛

嘉樂舊矣芳宴在斯載留神曠有睟天儀龍精

已映威仰未移葉依黃鳥花落春池

高殿弘敞禁林稠密青磴崛起丹樓間出翠葆

隨風金戈動日惆悵清管徘徊輕佻

灞澹入筵河淇流昨海一作媯若一作谷來往觴肴泔沂

歡飫終日一作有終清光欲莫輕貂回道一作首華組徐步



登賢博望獻賦清漳漢貳稱敏魏雨一作垂芳  
監撫有則七鬯無方瞻言守噐永愧元良

三日侍華光殿曲水宴代人應詔

羣分未辯類聚茲式天睠休明且求至德御繁  
實簡制動惟默官府百王衣裳萬國

中葉遭閔副內多違悠悠靈貺爰有適歸於昭  
睿後撫運天飛疑居中縣神動外畿

懸象著明離光乃位我有儲德微猷淵備長壽  
察書龍樓迴轡重道上庠行遵儒肆

朝陽有幹布葉萋萋思皇威矣鷓羽高棲出馳

先輅入秉介珪瞻秦望井建魯分奎

求賢每勞得士方逸有覺斯順無文咸秩萬箱  
惟重百綏載卹屈草戒諛階莫紀日

文教已肅武節旣馳榮光可照合璧如規載懷  
姑射尚想瑤池濯龍乃飾天淵在斯

作樂順動實符時義上春初吉亦留淵寄紅樹  
巖舒青莎一作蘊水被雕梁虹拖雲薨鳥跂

高懸甲帳周褰黼帷長筵列陛激水旋墀浮醪  
聚蟻靈蔡呈姿河宗躍踢海介夔跼

弱腕纖腰遷延妙舞秦箏趙瑟殷勤促柱降席



連綏稱觴接武稽首萬年獻茲多祜  
天地既成泉流既清薄暮沾幸屬奉文明將標  
齊配刻掃秦京願馳龍漠飲馬懸旌

三日侍宴曲水代人應詔

神理內寂機象外融遺情汾水垂冕鴻宮樹以  
司牧匪我求蒙徒勤日用誰契玄功  
往晦必明來碩資蹇於皇克聖時乘御辯寶曆  
載暉瑤光重踐昭昭舊物熙熙遷善  
當宁日昃求衣未明抵璧焚翠銷劍墮城九疇  
式序三辟再清虞箴罔闕矇奏傳聲

麗景則春儀方在震重聖積厚金式瓊潤天爵  
必諧王臣咸蓋譬諸華霍惟邦之鎮

正朔葱瀚冠冕邛越華長明堂相超魏闕龜象  
南薦環裘西發巢閣易窺馴庭難狘

上巳惟昔于彼禊流祓穢河澣張樂春疇既停  
龍駕亦泛鳧舟靈宮備矣無待茲遊

初鶯命曉朝霞

一作華

開夜飾陞道源迴伊流灞

極望天淵曲阻亭榭閒館巖敞長廊水架

金觴搖蕩玉俎推移筵浮水豹席擾雲螭寥亮  
琴瑟嗷咷墳笮歡茲廣讌穆穆天儀



宣城  
周道如砥康衢載直徒愧玄黃負恩無力華輜  
徒駕長纓未飾相彼失晨寧忘鼓翼

謝宣城集卷二

謝宣城集卷二

隋王鼓吹曲十首

元會曲

二儀啓昌曆三陽應慶期  
珪贄紛成序鞞譯憬來思  
分階絕組練充庭羅翠旗  
觴流白日下吹溢一作謚  
景雲滋天儀穆藻殿萬寓壽皇基

郊祀曲

六宗禋配岳五峙奠甘泉  
整蹕遊九闕清籥開八埏  
鏘鏘玉鑾動溶溶金障旋  
郊宮光已屬升柴禮既虔  
福響靈一作雲之集南岳固斯年



鈞天曲

高宴顥天臺置酒迎風觀笙鏞禮百神鐘石動  
雲漢瑤堂琴瑟驚綺席舞衣散紫鳳來參差玄  
鶴至凌亂已慶明庭樂誰想南風彈

入朝曲

江南佳麗地金陵帝王州逶迤帶綠水迢遞起  
朱樓飛甍夾馳道垂楊蔭御溝疑笳翼高蓋疊  
鼓送華輶獻納雲臺表功名良可收

出藩曲

雲枝紫薇內分組承明阿飛舳逝極浦旌節去

關河眇眇蒼山色沉沉寒水波鏡音巴渝曲簫  
鼓盛唐歌夫君邁惟德江漢仰清和

校獵曲

疑霜冬十月殺盛涼飈開原澤曠千里騰騎紛  
往來平置望煙合烈火從風迴殪獸華容浦張  
樂荆山臺虞人昔有諭明明時戒哉

從戎曲

選旅辭輶轅弭節赴河源日起霜戈照風迴連  
騎翻紅塵朝夜合黃沙萬里昏寥戾清笳轉蕭  
條邊馬煩自勉輟耕願征役去何言



送遠曲

北梁辭歡宴南浦送佳人方衢控龍馬平路騁  
朱輪瑤筵妙舞絕桂席羽觴陳白雲丘陵遠山  
川時未因一爲清吹激潺湲傷別中

登山曲

天明開秀萼瀾光媚碧堤風盪飄鶯亂雲行芳  
柳低暮春春服美遊駕凌丹梯升嶠旣小魯登  
巒且悵齊王孫尚遊行蕙艸正萋萋

泛水曲

玉露沾翠葉金風鳴素枝罷遊平樂苑泛鷁昆

明池旌旗散容裔簫管吹參差日晚厭遵渚採  
菱贈清漪百年如流水寸心寧共知

同沈右率諸公賦鼓吹曲名

芳樹

早翫華池陰復鼓滄洲柹椅杞芳若斯歲粧紛  
可繼霜下桂枝銷怨與飛蓬逝不厠玉盤滋誰  
憐終委細

同前

沈約

發萼九華隈開跼寒路側氤氳非一香參差多  
異色宿昔寒飈舉摧殘不可識霜雪交橫至對



之長歎息

同前

相望早春日煙花雜如霧復此佳麗人含情一作  
姿結芳樹綺羅已自憐萱風多有趣去來徘徊  
者佳人不可遇

當對酒

范雲

對酒心自足故人來共持方悅羅襟解誰念髮  
成絲徇性良為達求名本自欺追君當歌日及  
我傾罇時

臨高臺

時為隋  
王文學

千里常思歸登臺瞻一作臨綺翼纔見孤鳥還未  
辯連山極四面動清風朝夜起寒色誰知倦遊  
者嗟此故鄉憶

同前

沈約

高臺不可望望遠使人愁連山無斷絕河水復  
悠悠所思曖何在洛陽南陌頭可望不可至何  
用解人憂

巫山高

彷彿巫山高薄暮陽臺曲烟雲乍舒卷猿鳥時  
斷續彼美如可期寤言分在矚憮然坐相望秋



風下庭綠

同前

范雲

巫山高不極白日隱光輝  
靄靄一作遙遙朝雲出一作  
去冥冥暮雨歸巖懸獸無迹  
林暗鳥疑飛枕席竟誰薦  
相望空依依

同前

劉繪中書

高唐與巫山參差鬱相望  
灼爍在雲間氛氲出霞上  
散雨收夕臺行雲卷晨帳  
障本作出沒不易期  
嬋娟似以似惆悵

有所思

劉繪

別離安可再而我更重之  
佳人不相見明月空在帷  
共銜滿堂酌獨斂向隅眉  
中心亂如雪盃知有所思

同前

范雲

如何有所思而無相見時  
夙昔夢顏色階庭尋履  
綦高歌張一作更何已  
引滿終自持欲知憂能老  
為視鏡中絲

同賦雜曲名

陽春曲

擅秀才

青雲獻初歲白日映雕梁  
蘭萌猶自短柳葉未



能長已見花紅發復聞花藥香樂此試遊行誰  
知心獨傷

綠水曲

江朝請

塘上蒲欲齊汀洲杜將歇春心既易蕩春流豈  
難越桂棹及晚風菱影映初月芳香若可贈為  
君步羅襪

採菱曲

陶功曹

朝日映蘭澤乘風入桂嶼棹影已流倡輕舟復  
容與勿遽佳期移方追明月侶採採詎盈掬還  
望空延佇

白雪曲

朱孝廉

凝雲沒霄漢從風飛且散聯翩下幽谷徘徊依  
井幹既興楚客謠亦動周王歎所恨輕寒早不  
待陽春旦

秋竹曲

時為宣城守

嬈娟綺窻北結根未參差從風既裊裊映日頗  
離離欲求棗下吹別有江南枝但能凌白雪貞  
心蔭曲池

永明樂十首

帝圖閏九月皇風浮四溟永明一為樂咸池無



復靈

其二 樂十首

民和禮樂富世清歌頌徽鴻名軼卷領稱首邁  
垂衣

其三

朱臺鬱相望青槐紛馳道秋雲湛甘露春風散  
芝草

其四

龍樓日月照淄館風雲清儲光温似玉藩度式  
如瓊

其五

化洽鯤海君恩變龍庭長西北鴛還裘東南盡  
龜象

其六

出車長洲苑選旅朝夕川絡絡結雲騎奕奕泛  
戈船

其七

燕駟遊京洛趙服麗有輝清歌留上客妙舞送  
將歸

其八



實相薄五禮妙花開六塵明祥已玉燭寶瑞亦  
金輪

其九

生茂苜蘿性身與佳惠隆飛纓入華殿屣步出  
重宮

其十

彩鳳鳴朝陽玄鶴舞清商瑞此永明曲千載爲  
金皇

玉階怨

夕殿下珠簾流螢飛復息長夜縫羅衣思君此

何極

金谷聚

渠碗送佳人玉盃邀上客車馬一東西別後思  
今夕

王孫遊

綠草蔓如絲雜樹紅英發無論君不歸君歸芳  
已歇

銅爵悲

落日高城上餘光入總帷寂寂深松晚寧知琴  
瑟悲



江上曲

易陽春草出踟躕日已暮蓮葉尚田田淇水不  
可渡願子淹桂舟時同千里路千里既相許桂  
舟復容與江上可採菱清歌共南楚

曲池之水

緩步遵莓渚披襟帶蕙風芙蓉舞輕帶包筍出  
芳叢浮雲自西北江海思無窮鳥去能傳嚮見  
我綠琴中

同謝諮議詠銅爵臺

總帷飄井幹罇酒若平生鬱鬱西陵樹詎聞歌

吹聲芳襟染淚迹嬋娟空復情玉座猶寂寞况  
乃妾身輕



謝宣城集卷三

將發石頭上烽火樓

徘徊戀京邑躑躅纏曾阿陵高墀闕近眺迴風  
雲多荆吳阻山岫江海含瀾波歸飛無羽翼其  
如離別何

答王世子

飛雪天山來飄聚繩樞外蒼雲暗九重北風吹  
萬籟有酒招親朋思與清顏會熊席惟爾安羔  
裘豈吾帶公子不垂堂誰肯憐蕭艾

答張齊興



荆山從百里漢廣流無極北馳星斗正南望朝  
雲色川隰同幽快冠冕異今昔子肅兩岐功我  
滯三冬職誰知京洛念彷彿昆山側向夕登城  
濠潛池隱復直地迴聞遙蟬天長望歸翼清文  
忽景麗思泉紛寶飾勿言脩路阻勉子康衢力  
曾厓寂且寥歸軫逝言陟

酬王晉安

稍稍枝早動塗塗露晚晞南中榮橘柚寧知鴻  
鴈飛拂霧朝青閣日旰坐彤闈悵望一途阻參  
差百慮依春草秋更綠公子未西歸誰能久京

洛淄塵染素衣

暫使下都夜發新林至京邑贈西府同  
寮

大江流日夜客心悲未央徒念關山近終知返  
路長秋河曙耿耿寒渚夜蒼蒼引領見京室宮  
雉正相望金波麗鳩鵲玉繩低建章驅車鼎門  
外思見昭丘陽馳暉不可接何況隔兩鄉風雲  
有鳥路江漢限無梁常恐鷹隼擊時菊委嚴霜  
寄言尉羅者寥廓已高翔

始出尚書省



惟昔逢休明十載朝雲陞既通金閨籍復酌瓊  
筵醴宸景厭昭臨昏風淪繼體紛虹亂朝日濁  
河穢清濟防口猶寬政餐茶更如薺英究暢人  
謀文明固天啓青精翼紫軼黃旗映朱邸還覩  
司隸章復見東都禮中區咸已泰輕生諒昭灑  
趨事辭宮闕載筆陪旌祭邑里向踈蕪寒流自  
清泚衰柳尚沉沉疑露方泥泥零落悲友朋歡  
娛燕兄弟既秉丹石心寧流素絲涕因此得蕭  
散垂竿深澗底

直中書省

紫殿肅陰陰彤庭赫弘敞風動萬年枝日華承  
露掌玲瓏結綺錢深沉映朱網紅藥當堦翻蒼  
苔依砌上茲言翔鳳池鳴珮多清響信美非吾  
室中園思偃仰朋情以鬱陶春物方駘蕩安得  
凌風翰聊咨山泉賞

觀朝雨

朔風吹飛雨蕭條江上來既灑百常觀復集九  
成臺空濛如薄霧散漫似輕埃平明振衣坐重  
門猶未開耳目暫無擾懷古信悠哉戢翼希驥  
首乘流畏曝鳃動息無兼遂岐路多徘徊方同



戰勝者去剪北山萊

新亭渚別范零陵雲

洞庭張樂地瀟湘帝子遊雲去蒼梧野水還江  
漢流停驂我悵望輟棹子夷猶廣平聽方籍茂  
陵將見求心事俱已矣江上徒離憂

之宣城郡出新林浦向板橋

江路西南永歸流東北驚天際識歸舟雲中辯  
江樹旅思倦搖搖孤遊昔已屢旣歡懷祿情復  
協滄洲趣囂塵自茲隔賞心於此遇雖無玄豹  
姿終隱南山霧

始之宣城郡

下帷闕章句高談媿名理踈散謝公卿蕭條依  
椽史簪髮逢嘉惠教義承君字心迹苦未并憂  
歡將十祀幸沾雲雨慶方纒參多士振鷺徒追  
飛群龍難隸齒烹鮮止貪兢共治屬廉耻伊余  
昧損益何用祗千里解劍北宮朝息駕南川涘  
寧希廣平詠聊慕華陰市垂簷宛洛遊多謝金  
門裏招招漾輕楫行行趨巖趾江海雖未從山  
林於此始

宣城郡內登望



借問下車日匪直望舒圓寒城一以眺平楚正  
蒼然山積陵陽阻溪流春穀泉威紆詎遙甸巉  
岳帶遠天切切陰風暮桑柘起寒煙悵望心已  
極尚恍寃屢遷結髮倦爲旅平生早事邊誰規  
鼎食盛寧要狐白解方棄汝南諾言稅遼東田

冬日晚郡事隙

案牘時閒暇偶坐觀卉木颯颯滿地荷脩脩蔭  
窓竹簷隙自周流房櫳間且爾蒼翠望寒山崢  
嶸瞰平陸已惕慕歸心復傷千里目風霜旦夕  
甚蕙草無芬馥云誰美笙簧孰是厭適軸願言  
稅逸駕臨潭餌秋菊

後齊迴望

高軒瞰四野臨臨眺襟帶望山白雲裡望水平  
原外夏木轉成帷秋荷漸如蓋鞏洛常瞻然搖  
心似懸旆

落日悵望

昧旦多紛喧日晏未遑舍落日餘清陰高枕東  
窻下寒槐漸如束秋菊行當把借問此何時涼  
風懷朔馬已傷慕歸客復思離居者情嗜幸非  
多案牘偏爲寡旣乏瑯琊政方憇洛陽社



望三湖

積水照頰霞高臺望歸翼平原周遠近連汀見  
紆直歲蕤向春秀芸黃共秋色薄暮傷哉人嬋  
媛復何極

遊山

託養因支離乘閒遂疲蹇語默良未尋得喪云  
誰辯幸蒞山水都復值清冬緬凌厓必千仞尋  
谿將萬轉堅嶠既峻增迴流復宛澶杳杳雲竇  
深淵淵石溜淺傍眺鬱篔簹還望森柗榭荒陬  
被歲莎崩壁帶苔蘚鼯狖叫層巖鷗鳧戲沙衍  
觸賞聊自觀即趣咸已展經目惜所遇前路欣  
方踐無言蕙草歇留垣芳可攀尚子時未歸邴  
生思自免永志昔所欽勝迹今能選寄言賞心  
客得性良爲善

賽敬亭山廟喜雨

夕悵懷椒糈蠲景潔膏薌登秋雖未獻望歲佇  
年祥潭淵深可厲狹斜車未方蒙龍度絕限出  
沒見林堂秉玉朝羣帝樽桂迎東皇排雲接虬  
蓋蔽日下霓裳會舞紛瑤席安歌遶鳳梁百味  
芬綺帳四座沾羽觴福被延民澤樂極思故鄉



登山騁歸望原雨晦茫茫胡寧昧千里解珮拂  
山莊日不費

祀敬亭山廟

翦削兼太華崢嶸跨玄圃貝闕眠阿宮薜帷陰  
網戶參差時未來徘徊望澧浦椒糝若馨香無  
絕傳終古

遊敬亭山

茲山亘百里合沓與雲齊隱淪既已託靈異居  
然棲上干蔽白日下屬帶迴谿交藤荒且蔓樛  
枝聳復低獨鶴方朝唳饑飈此夜啼滌雲已漫

漫夕雨亦淒淒我行雖紆組兼得尋幽蹊緣源  
殊未極歸徑宵如迷要欲追竒趣即此陵丹梯  
皇恩竟已矣茲理庶無睽

賦貧民田

假遇一作佳譽非將迎靖共一作靜拱延殊慶中歲歷三

臺旬月典邦政會一作會是共治一作怡情敢忘邨

貧病將無富教禮孰有知方性敦本抑工商均

業省兼并察壤見泉脉覘星視農正黍稷緣高

殂穰一作梗稌即卑盛舊埒新塍分青苗白水映

遙樹匝清陰連山周遠淨即此風雲佳孤觴聊



可命旣微三載道庶藉兩岐詠俾爾倉廩實余  
從谷口鄭

與江水曹至濱干戲

山中上芳月故人清樽賞遠山翠百重迴流映  
千丈花枝聚如雪蕪絲散猶網別後能相思何  
嗟異封壤

送江曹還遠館

高館臨荒途清川帶長陌上有流思人懷舊望  
歸客塘邊草雜紅樹際花猶白日暮有重城何  
由盡離席

送江兵曹檀主簿朱孝廉還上國

方舟泛春渚攜手趨上京安知慕歸客詎憶山  
中情香風蘂上發好鳥葉間鳴揮袂送君已獨  
此夜琴聲

臨溪送別

悵望南浦時徙倚北梁步葉上涼風初日隱輕  
霞暮荒城迥易陰秋溪廣難渡沫泣豈徒然君  
子行多露

將遊湘水尋句溪

旣從陵陽釣桂鱗驂赤螭方尋桂水原謁帝蒼



山垂辰哉且未會乘景弄清漪瑟汨瀉長淀潺  
湲赴兩岐輕蘋上靡靡雜石下離離寒草分花  
映戲鮪乘空移興以暮秋月清霜落素枝魚鳥  
余方翫纓綉君自縻及茲暢懷抱山川長若斯  
忝役湘州與宣城吏民別

弱齡倦簪履薄晚忝華輿閒沃盡地區山泉諧

所好幸遇昌化穆惇一作淳俗罕驚暴四時從偃

息三省無侵冒下車遽暄席紆服始黔竈榮辱  
未遑敷德禮何由導汨徂奉南岳蕪秩典邦號  
疲馬方云驅鉛刀安可操遺惠良寂寞恩靈亦

匪報柱水日悠悠結言幸相勞吐納貽爾和窮  
通勗所蹈

休沐重還丹陽道中

薄遊第從告思間願罷歸還叩歌賦似休汝車  
騎非灞池不可別伊川難重違汀葭稍靡靡江  
災復依依田鵠遠相叫沙鵠忽爭飛雲端楚山  
見林表吳岫微試與征徒望鄉淚盡沾衣賴此  
盈樽酌含景望芳菲問我勞何事霑沐仰清微  
志狹輕軒冕恩甚戀閨闈歲華春有酒初服偃  
郊扉



移病還園示親屬

疲策倦人世歛性就幽蓬  
停琴佇涼月滅燭聽歸鴻  
涼薰乘暝晰秋華臨夜空  
葉低知露密崕斷識雲重  
折荷葺寒袂開鏡晒衰容  
海暮騰清氣河關秘棲冲  
煙衡時未歇芝蘭去相從

出下館

麥候始清和涼雨銷炎燠  
紅蓮搖弱荇丹藤繞新竹  
物色盈懷抱方駕娛耳目  
零落既難留何用存華屋

遊東田

戚戚苦無悰攜手共行樂  
尋雲陟累榭隨山望菌閣  
遠樹暖阡阡生煙紛漠漠  
魚戲新荷動鳥散餘花落  
不對芳春酒還望青山郭

秋夜講解

四緣去誰肇七識習未央  
沉沉一作淵淵倒營魄苦

蔭感愁腸琴瑟徒爛熳  
姱容空滿堂春顏遽幾日  
秋壟終茫茫孰云濟沉溺  
假願託津梁惠唱擣泉湧  
妙演發金相空有定無執  
賓實固兩忘自來乘首夏  
及此申暮霜雲物清晨景  
衣巾引夕涼風振蕉蓬裂  
霜下梧楸傷一作露下六龍



且無借三相寧久長何時接靈應及子同舟航  
秋夜

秋夜促織鳴南鄰搗衣急思君隔九重夜夜空  
佇立北窗輕幔垂西戶月光入何知白露下坐  
視階前濕誰能長分居秋盡冬復及

春思

茹溪發春水叱山起朝日蘭色望已同萍際轉  
如一巢燕聲上下黃鳥弄儔匹邊郊阻遊衍故  
人盈契闊夢寐借假簧思婦賴倚瑟幽念漸鬱  
陶山楹永爲室

治宅

結宇夕陰街荒幽橫九曲迢遞南川陽迤邐西  
山足闢館臨秋風敞窓望寒旭風碎池中荷霜  
翦江南菜既無東都金且稅東臯粟

冬緒羈懷示蕭諮議虞田曹劉江二常  
侍

去國懷丘園入遠滯城闕寒燈耿宵夢清鏡悲  
曉髮風草不留霜冰池共如月寂寞此閒惟琴  
樽任所對客念坐嬋媛年華稍菴夢風慕雲澤  
遊共奉荆臺績績一作一聽春鶯喧再視秋虹沒



疲驂良易返恩一作思波不可越誰慕臨淄鼎常  
希茂陵渴依隱幸自從求心果蕪味方軫歸歎  
願故山芝未歇

懷故人

芳洲有杜若可以贈佳期望望忽超遠何由見  
所思行行未千里山川已間之離居方歲月故  
人不在茲清風動簾夜孤月照窓時安得同携  
手酌酒賦新詩

夜聽妓二首

瓊閨釧響聞瑤席芳塵滿要取洛陽人共命江

南管情多舞態遲意傾歌弄緩知君密見親寸  
心傳玉盃

其二

上客光四坐佳麗直千金挂釵報纓絕墮珥答  
琴心蛾眉已共笑清香復入襟歡樂夜方靜醉  
帳垂沉沉

京路夜發

擾擾整夜裝肅肅戒徂兩曉星正寥落晨光復  
漾漭猶沾餘露團稍見朝霞上故鄉邈已負山  
川脩且廣文奏方盈前懷人去心賞敕躬每跼



躋瞻恩惟震蕩行矣倦路長無由稅歸鞅

晚登三山還望京邑

灞涘望長安河陽視京縣白日麗飛甍參差皆  
可見餘霞散成綺澄江靜如練喧一作鳥覆春  
洲雜英滿芳甸去矣方滯淫懷哉罷歡宴佳期  
悵何許淚下如流霰有情知望鄉誰能鬢不變

高齋視事

餘雪映青山寒霧開白日曖曖江村見離離海  
樹出披衣就清盥憑軒方秉筆列俎歸單味連  
駕止容膝空爲大國憂紛詭諒非一安得掃蓬

逕鎖吾愁與疾

郡內高齋閒望答呂法曹

呂僧珍爲  
齊王法曹

結構何迢遞曠望極高深窓中列遠岫庭際俯  
喬林日出衆鳥散山暝孤猿吟已有池上酌復  
此風中琴非君美無度孰爲勞寸心惠而能好  
我問以瑤華音若遺金門步見就玉山岑

謝宣城集卷三



謝宣城集卷四

和蕭中庶直石頭

九河亘積岨三巖鬱旁眺皇州總地德回江歎  
巖徼井幹絕蒼林雲薨蔽層嶠川霞旦上薄山  
光晚餘照翔集亂歸飛虹蜺紛引曜君子奉神  
略瞰迴憑重峭彈冠已籍甚升車益英妙功存  
漢冊書榮並周庭燎汲疾移偃息董園倚談咲  
麾旆一悠悠謙姿光且劭讌嘉多暇日興文起  
淵調曰余厠鱗羽滅影從漁釣澤渥資投分逢  
迎典待詔詠沼邈含毫專城空坐嘯徒慚皇鑒



揆終延曲士請方追隱淪訣偶解金丹要若偶  
巫咸招帝閭良可叫

直石頭

蕭衍附

率土皆王土安知全高尚東壟棄黍稷西遊入  
卿相屬逢利建始投分參末將尺一功未施河  
山賞已諒攝官因時暇曳裾聊起望鬱盤地勢  
遠參差百雉壯翠壁絳霄際丹樓青霞上夕池  
出濠渚朝雲生疊嶂籠鳥易爲恩屠羊無飾讓  
泰階端且平海水本無浪小臣何日歸頓轡從  
閒放

奉和竟陵王同沈右率過劉先生墓

嘉樹因枝條琢玉良可寶若人陵曲臺垂帷茂  
淵道善誘宗學原鳴鐘霽幽抱仁焉徂宛洛清  
徽夜何早歲晚結松陰平原亂秋草不有至言  
揚終滯西山老

登山望雷居士精舍同沈右衛過劉先

生墓下作

并序

竟陵王蕭子良

沛國劉子珪學優未

一作來

仕跡邈心遐履信體

仁古之遺德潛舟迅景滅賞淪輝言念芳猷式  
懷嗟述屬舍第隨郡有示來篇彌緝久要之情



益深宿草之歎升望西山率爾爲答雖因事雷  
生實申悲劉子云爾

漢陵淹館蕪晉彌洙風缺五都聲論空三河文  
義絕興禮邁前英談玄踰往哲明情日夜深微  
音歲時滅垣井總已平煙雲從容裔爾歎牛山  
悲我悼驚川逝

經劉瓛墓下

隨郡王蕭子隆

升堂子不謬問道余未窮如何辭白日千載隔  
音通山門一已絕長夜緬難終初松切暮鳥新  
楊催曉風榛關向蕪密泉途轉銷空

奉和

虞炎

下帷聞昔儒窺園信且逸聚學叢烟郊栖遁事  
環葦戢景謝歸年稅駕空悠日庭露已沾衣松  
門向蕭瑟憫憫神念周依依惠言密

又

柳惲

西河寂高業北海望清塵曾微誰與寄尚德在  
伊人遺文重昭晰絕緒復紛綸露華白朝日蘭  
生無久春芳猷動淵思撫軾履高辰山風起寒  
木野雀亂秋榛壟草時易宿素軌邈難遵

又

沈約



表間欽逸軌軾墓禮貞魂化途終眇默神禮暖  
猶存塵駕未輟幌高衡已委門日蕪子雲舍徒  
望董生園華陰無遺市楚席有靈樽玄泉倘能  
慰長夜且勿論

離夜

玉繩隱高樹斜漢耿層臺離堂華燭盡別幌清  
琴哀翻潮尚知限客思取難裁山出不可夢况  
及乃一作故人杯

同前

江丞

石泉行可照蘭杜向含風離歌上春日芳思徒

以空情遽曉雲發心在夕河終幽琴一罷調清  
酌誰復同

同前

王常侍

月没高樓曉雲起扶桑時燭筵暖無色行住憫  
相悲當軒已凝念况乃清江湄懷人忽千里誰  
緩髻徂絲

和沈右率諸君餞謝文學

春夜別清樽江潭復爲客嘆息東流水如何故  
鄉陌重樹日芬蓋芳洲轉如積望望荆臺下歸  
夢一作轉坐相思夕



錢謝文學

沈右率

漢池水如帶巫山雲似蓋  
澗泪背吳潮潺湲橫  
楚瀨一望阻漳水寧思江海會  
以我徑寸心從君千里外

同前

虞別駕

差池燕始飛  
纂歷草初輝  
離人悵東顧  
遊子去西歸  
清潮已駕渚  
溽露復沾衣  
一乖當春聚  
方掩故園扉

同前

王中書

所知共歌吹  
誰忍別笑歌  
離軒思黃鳥  
分渚夢

清莎翻情結  
遠旆灑淚與  
煙波春江夜  
明月還望情如何

同前

蕭記室

執手無還顧  
別渚有西東  
荆吳渺何際  
煙波千里通  
春篁方解籜  
弱柳向尚一作低  
風相思將安寄  
悵望南飛鴻

同前

劉中書

汀洲千里芳  
朝雲萬里色  
悠然在天隅  
之子去安極  
春潭無與窺  
秋臺共誰陟  
不見一佳人  
徒望西飛翼



和王長史卧病

岷岫欵崇崔嵬別朝洪河兔園文雅盛章臺冠  
蓋多淵襟眷睿岳燮贊動吐歌碩影慚駢服載  
筆旅江沱縞衣紛可獻琴言暖已和青臯向還  
色春潤視生波巖垂變好鳥松上改陳蘿日與  
歲眇邈歸恨積一作稍蹉跎願緝吳山杜寧袂楚  
池荷清風豈孤劭功遂懷曾阿勿樂良有暢荏  
蕙芳未過幸留清樽味言籍故田莎  
臥疾叙意 王秀之  
貞悔不少期福極固難豫疾藥雖一途遂以干

百慮景仄念徂齡帶緩每危曙循躬雖一作已  
茲况復歲將暮層冰日夜多飛雲密如霧歸鴻  
互斷絕宿鳥莫能去輟我丘中瑟良田一嗟故  
隱淪迹有違宰官功未樹何用攬余情恨恨此  
故路豈言勞者歌且曰幽人賦

和沈祭酒行園

清淮左長薄荒徑隱高蓬回潮旦夕上寒渠左  
右通霜畦紛綺錯秋町鬱蒙茸環梨縣已紫珠  
榴折且紅君有棲心地伊我歡既同何用甘泉  
側玉樹望青葱



寒瓜方臥壟秋菰亦滿陂紫茄紛爛熳綠芋鬱  
參差初菘向堪把時韭日離離高梨有繁實何  
減萬年枝荒渠集野鴈安用昆明池

和江丞北戍瑯琊城

春城麗白日阿閣跨層樓蒼江忽渺渺驅馬復  
悠悠京洛多塵霧淮濟未安流豈不思撫劍惜  
哉無輕舟夫君良自勉歲暮勿淹留

北戍瑯琊城

江孝嗣附

驅馬一聯翩日下情不息芳柳似佳人惆悵余

何極薄暮苦羈愁終朝傷旅食丈夫許人世安  
得顧心臆按劍勿復言誰能耕與織

和徐都曹出新亭渚

宛洛佳遊遊春色滿皇州結軫青郊路迴瞰蒼  
江流日華川上動風光草際浮桃李成蹊徑桑  
榆蔭道周東都已傲載言歸望綠疇

昧旦出新亭渚

徐勉附

驅車凌早術山華映初日纜轡且徘徊復值清  
江謐杳靄楓樹林參差黃鳥匹氣物宛如斯重  
以心期逸春堤一遊行終朝意殊悉



和劉中書

昔余侍君子歷此遊荆漢山川隔舊賞朋僚多  
雨散圖南矯風翮曾非息短翰移疾覲新篇披  
衣起淵翫惆悵懷昔踐彷彿得殊觀頽紫共彬  
駮雲錦相凌亂奔星上未窮驚雷下將半迴潮  
漬崩樹輪囷軋傾岸巘篠或傍翻石菌蕪脩幹  
澄澄明浦媚衍衍清風爛江潭良在目懷賢興  
累歎歲暮不我期淹留絕巘畔

入琵琶峽望積石磯呈玄暉

江山信多美此地最爲神以茲峰石麗重在芳

柳春照爛虹蜺雜交錯錦繡陳差池若燕羽前  
劣似龍鱗却瞻了非向前觀復已新翠微上虧  
景清莎下拂津巉巖如刻削可望不可親昔途  
首遐路未獲究清塵誓將返初服歲暝請爲鄰

在郡臥病呈沈尚書

淮揚股肱守高卧猶在茲况復南山曲何異幽  
棲時連陰盛農節臺筮聚東菑高閣常晝掩荒  
堦少諍辭珍簟清夏室輕扇動涼颺嘉魴聊可  
薦綠蟻方獨持夏李沉朱實秋藕折輕絲良辰  
竟何許夙昔夢佳期坐嘯徒可積爲邦歲已暮



絃歌終莫取撫机今自強

答謝宣城

沈約附

王喬飛鳧舄東方金馬門從宦非宦侶避世不  
避喧揆余發皇覽短翮屢飛翻晨趨朝建禮晚  
沐臥郊園賓至下塵榻憂來命綠樽昔賢侔時  
雨今守馥蘭蓀神交疲夢寐路遠隔思存牽拙  
謬東汜浮情反西崑顧循良菲薄何以儷璵璠  
將隨渤澥去刷羽泛清源

和何議曹郊遊二首

春心澹容與挾弋步中林朝光映紅萼微風吹

好音江垂得清賞山際果幽尋未嘗遠離別知  
此愜歸心流沂終靡已嗟行方至今

江臯倦遊客薄暮懷歸者揚舲浮大川惆悵至  
日下霾靡青莎被潺湲石溜瀉寄語持笙簧舒  
憂願自假歸途豈難涉翻同江上夏

和劉西曹望海臺

滄波不可望望極與天平徃徃孤山映處處春  
雲生差池遠鴈沒颯沓群鳧驚囂塵及薄領棄  
捨出重城臨川徒可羨結網庶時營

和王中丞聞琴



涼風吹月露圓景動清陰蕙風入懷抱聞君此  
夜琴蕭瑟滿林聽輕鳴嚮潤音無為澹容與蹉  
跎江海心

和伏武昌登孫權故城

炎靈遺劔璽當塗駭龍戰聖期缺中壤霸功興  
寓縣鵲起登吳山鳳翔凌楚甸襟帶窮巖險惟  
纒盡謀選北拒溺驂鑣西戡一作收組練四作  
江海既無波俯仰流英眇裘冕類裡郊卜揆崇  
離殿鈞臺臨講閱樊山開廣讌文物共歲蕤聲  
明且葱蒨三光厭分景書軌欲同薦參差世一作

代祀忽寂寞市朝變舞館識餘基歌梁想遺轉

一作故林衰木平荒池秋草遍雄圖悵若茲茂

宰深遐睠幽客滯江臯從賞垂纓弁清卮阻獻

酬良書限聞見幸籍芳音多承風采餘絢于役

倘有期鄂渚同遊衍

夏始和劉潺陵

威仰弛蒼郊龍曜表皇隰春色眷遙甸炎光麗  
近邑白蘋望已騁湘荷紛可襲徒願尺波旋終  
憐寸景戢對窓斜日過洞幌鮮飈入浮雲去欲  
窮暮鳥飛相及柔翰纈芳塵清源非易揖迴江



難絕濟云誰暢佇立良宰勗夜漁出入事朝汲  
積羽余旣裳更賦予盈粒倚梧何必零歸來共  
樓集

和宋記室省中

落日飛鳥遠憂來不可極竹行一作樹澄遠陰雲  
霞成異色懷歸欲乘電瞻言思解翼清揚婉禁  
居秘此文墨職無歎阻琴樽相從伊水側

和王著作融八公山

二別阻漢坻雙嶠望河澳茲嶺復嶺岿分區奠  
淮服東限瑯琊臺西距孟諸陸阡眠起雜樹檀

藥蔭脩竹日隱澗疑空雲聚岫如複出役眺樓  
雉遠近送春目戎州昔亂華素景淪伊穀貼危  
賴宗袞微宦寄明牧長蛇固能剪奔鯨自此曝  
道峻芳塵流業遙年運條平生仰令圖吁嗟命  
不淑浩蕩別親知聯翩戒征軸再遠館娃宮兩  
去河陽谷風煙四時犯霜雨朝夜沐春秀良已  
凋秋塲庶能築

和王主簿季括怨情

掖庭聘絕國長門失歡宴相逢詠薜蘿辭寵悲  
團扇花叢亂數蝶風簾入雙燕徒使春帶賒坐



惜紅粧變平生一顧重宿昔千金賤故人心尚  
爾故人心不見一作故人心不見

贈王主簿二首

日落窻中坐紅粧好顏色舞衣襞未縫流黃覆  
不織蜻蛉草際飛遊蜂花上食一遇長相思願  
寄連翩翼

清吹要碧玉調玄命綠珠輕歌急綺帶含笑解  
羅襦餘曲詎幾許高駕且踟躕徘徊韶景暮惟  
有洛城隅

同王主簿有所思

佳期期未歸望望下鳴機徘徊東陌上月出行  
人稀

落日同何儀曹照

參差複殿影氛氲綺羅雜風入天淵池芰荷搖  
復合遠聽雀聲聚回望樹陰杳一賞桂尊前空  
傷蓬鬢颯

和紀參軍服散得益

金液稱九疇西山歌五色鍊質乃排雲濯景終  
不測雲英亦可餌且駐羲和力能令長卿臥暫  
故遇真識



新治北窻和何從事

國小暇日多民淳紛務屏闕牖期清曠開簾候  
風景泱泱日照溪團團雲去嶺岩萋蘭撩峻駢  
闐石路整池比樹如浮竹外山猶影自來彌弦  
望一作及君臨箕穎清文蔚且詠微言超一作  
已領不見城壕側思君朝夕頃迴舟方在辰何  
以慰延頸

同羈夜集

積念隔炎涼驤言始今夕已對濁樽酒復此故  
鄉客霜月始流砌寒蛸早吟隙幸籍京華遊邊

城讌良席樵采咸共同荆莎聊可籍恐君城闕  
人安能久松柏

謝宣城集卷四



謝宣城集卷五

奉和隨王殿下十六首

玄冬寂脩夜天圍靜且開  
亭臯霜氣愴松宇清  
風來高琴時以思幽人多感懷  
幸籍汾陽想嶺首正徘徊

其二

高秋夜方靜神居肅且深  
閒階塗廣路涼宇澄  
月陰嬋娟影池竹踈蕪散風林淵  
情協爽節詠言興德音闇道空  
已積千直愧蓬心

其三



愴愴緒風興  
祁祁族雲布  
嚴氣集高軒  
稠陰結寒封  
日月謬論思  
朝夕承清豫  
徒籍小山文  
空揖章臺賦

其四

星回夜未艾  
洞房凝遠情  
雲陰滿地榭  
中月懸高城  
喬木含風霧  
行鴈飛且鳴  
平臺盛文雅  
西園富群英  
芳慶良永矣  
君王嗣德聲  
眷此伊洛詠  
載懷汾水情  
顧已非麗則  
恭惠奉仁明  
觀滔詠已失  
憮然愧簪纓

其五

蕭景遊清都  
脩簪待蘭室  
累榭踈遠風  
廣庭曩朝日  
穆穆神儀靜  
惜惜道言密  
一餐繫靈表  
無吝科年曆

其六

神心遺魏闕  
中想顧汾陽  
蕭景懷辰豫  
捐玦翦山楊  
時惟清夏始  
雲景暖含芳  
月陰洞野色  
日華麗池光  
草合亭臯遠  
露生川路長  
端坐聞鶴引  
靜瑟愴復傷  
懷哉泉石思  
歌詠樽酒相  
塘春多迭駕  
言從伊與商  
袞職眷英覽  
獨善伊何忘  
願輟東都遠  
弘道侍云梁



其七

清房洞已靜閒風伊夜來雲生樹陰遠軒廣月  
容開宴私移燭飲遊賞籍琴臺風猷冠淄鄴衽  
烏愧唐牧

其八

方池含積水明月流皎鏡規荷承日泫影鱗與  
風沫上善叶淵心止川測動性幸是芳春來側  
點游濠盛

其九

浮雲西比起飛來下高堂合散輕帷表飄舞桂

臺陽遙階收委羽平地如夜光眷言金玉照顧  
慚蘭蕙芳

其十

睿心重離折岐路清江隈四面寒飈舉千里白  
雲來川長別管思地迥翻旗回還顧照陽闕超  
遠章華臺置酒巫山日爲君停玉杯

十一

桂樓飛絕限超遠向江岐輕雲霽廣甸微風散  
清漪連連絕鴈舉渺渺青烟移嚴城亂芸草霜  
塘凋素枝氣爽深遙矚豫永聊停曦一作巳



終可悅盈思且若斯

十二

炎光缺風雅宗霸拯時淪龍德待雲霧令圖方  
再晨歲遠荒城思霜華宿州陳英威遽如是徘徊  
岐路人

十三

念深冲照廣業闡清化玄端儀穆金殿教藻  
瓊筵船湛輕帷藹磬轉芳風旋卷轡栖道樹方  
津棹法舫歸興憑大造昭塗良易筌

十四

分悲玉瑟斷別緒金樽傾風入芳帷散釭華蘭  
殿明想折中園草共知千里情行雲故鄉色贈  
子一離聲

十五

年華豫已滌夜艾賞方融新萍時合水弱草未  
勝風閨幽瑟易嚮臺迴月難中春物廣餘照蘭  
萱佩未窮

十六

連漪映餘雪嚴城限深霧清寒起洞門東風急  
池樹神居望已肅徘徊舉冲趣栖歸如歸詠丘



山不可屨

詠風

徘徊發紅萼歲蕤動綠旒垂楊低復舉新萍合  
且離步檐行袖靡當戶思襟披高響飄歌吹相  
思子未知時拂孤鸞鏡星鬢視參差

詠竹

前窓一叢竹青翠獨言竒南條交北葉新筍雜  
故枝月光踈已密風來起復垂青鳧飛不礙黃  
口得相窺但恨從風籜根株長別離

詠薔薇

低枝詎勝葉輕香幸自通發莖初攢紫餘采尚  
霏紅新花對白日故蘂逐行風參差不俱曜誰  
肯盼薇叢

詠蒲

離離水上蒲結水散爲珠間厠秋菡萏出入春  
鳧雛初萌實雕俎暮蒞雜椒塗所悲堂上曲遂  
鑠黃金軀

詠兔絲

輕絲旣難理細縷竟無織爛熳已萬條連綿復  
一色安根不可知縈心終不測所貴能卷舒伊



用蓬生直

詠落梅

新葉初冉冉初蕊新菲菲逢君後園燕相隨巧  
笑歸親勞君王指摘以贈南威用持插雲髻翡翠  
翠比光輝日暮長零落君恩不可追

遊東堂詠桐

孤桐北窗外高枝百尺餘葉生既婀娜葉落更  
扶踈無華復無實何以贈離居裁為圭與瑞足  
可命參墟

詠磻北梔子

有美當階樹霜露未能移金黃發朱采映日以  
離離幸賴夕陽下餘景及西枝還思照綠水君  
階無曲池餘榮未能已晚實猶見竒復留傾筐  
德君恩信未貲

同詠樂器

琴

洞庭風雨榦龍門生死枝雕刻紛布濩冲嚮鬱  
清卮一作春風搖蕙一作草秋月滿華池是時  
操別鶴淫淫客淚垂

琵琶



抱月如可明懷風殊復清絲中傳意緒花裡寄  
春情掩抑有竒態淒鏘多好聲芳袖幸時拂龍  
門空自生

篴

江南簫管地妙響發孫枝殷勤寄玉指含情舉  
復垂雕梁再三繞輕塵四五移曲中有深意丹  
誠君詎知

同詠坐上器玩

烏皮隱几

蟠木生附枝刻削豈無施取則龍文鼎三趾獻

光儀勿言素韋潔白沙尚推移曲躬奉微用聊  
承終宴疲

竹櫝榔盤

稍風有勁質柔用道非一平織方以文穹成圓  
且密薦羞雖百品所貴浮天實幸承歡醕餘寧  
辭嘉宴畢

同詠坐上所見一物

席

本生朝夕池落景照參差汀洲蔽杜若幽渚奪  
江蘼遇君時采擷玉座奉金卮但願羅衣拂無



使素塵彌

同前

照日汀洲際  
搖風綠潭側  
雖無獨壘絲  
幸有青袍色  
羅袖少輕塵  
象牀多麗飾  
願君蘭夜飲  
佳人時宴息

幔

幸得與珠綴  
累歷君之楹  
月映不辭卷  
風來輒自輕  
每聚金爐氣  
時駐玉琴聲  
但願致樽酒  
蘭缸當夜明

簾

青軒明月時  
紫殿秋風日  
曛曛引光輝  
曖曖映容質  
清露依檐垂  
蛸絲當戶密  
舉開誰共臨  
掩眴獨如失

詠竹火籠

庭雪亂如花  
井水粲成玉  
因炎入貂袖  
懷溫奉芳褥  
體密用宜通  
文邪性非曲  
本自江南墟  
媿娟脩且綠  
暫承君玉指  
請謝陽春旭

同前

結根終南下  
防露復披雲  
雖爲九華扇  
聊可滌炎氛  
安能偶狐白  
鶴卵織成文  
覆持鴛鴦被  
百



和吐氛氲忽為織手用歲暮侍一作羅裙

詠鏡臺

玲瓏類丹檻茗亭似玄闕對鳳懸清水垂龍挂  
明月照粉拂紅粧插花理雲髮玉顏徒自見常  
畏君情歌

詠燈

發翠斜溪裏蓄寶宕山峰抽莖類僊掌銜光似  
燭龍飛蛾再三繞輕花四五重孤對相思夕空  
照舞衣縫

詠燭

杏梁賓未散桂宮明欲沉暖色輕帷裡低光照  
寶琴徘徊雲髻影的皪綺疏金恨君秋月夜遺  
我洞房陰

詠邯鄲故才人嫁為廝養卒婦

生平宮閣裏出入侍丹墀開筍方羅縠窺鏡比  
鬢眉初別意未解去久日生悲顛顛不自識嬌  
羞餘故姿夢中忽彷彿猶言承燕私

詠鷓鴣

蕙草含初芳瑤池暖晚色得廁鴻鸞影晞光弄  
羽翼



聯句

阻雪

積雪皓陰池北風鳴細枝九遠密如繡何為遠  
 別離風庭舞流霰冰沼結文澌飲春離以燠欽  
 覽紛若馳江秀珠囊條間聲玉留檐下垂杯酒  
 不相接寸心良共知王丞飛雲亂無緒結冰明  
 曲池雖乖促席讌白首信勿虧王蘭陵飄素瑩  
 簷溜巖結噎通岐罇罌如未澣况乃限音儀謝  
 吳劍原隰望徒倚松筠竟不移隱憂惡萱樹忘懷  
 待山巖劉中初昕逸翮舉日具駑馬疲幽山有

桂樹歲暮方參差

沈祐

還塗臨渚

綠水纈清波青山繡芳質落景皎晚陰殘花綺  
 餘日何行白沙澹無際青山眇如一傷此物運  
 移惆悵望還律吳白水田外明孤嶺一作松上  
 出即趣佳可淹淹留非下秩府君

紀功曹中園

蘭亭仰遠風芳林接雲嶸傾葉順清飆脩莖佇  
 高鶴何從連綿夕雲歸晻曖日將落寸陰不可  
 留蘭墀豈停酌吳丹纓猶照對綠筠方解籜永



志能兩忘即賞謝丘壑府君

閒坐

雨洗花葉鮮泉漫芳塘溢藉此閒賦詩聊用蕩

羈疾陳郎霖霖微雨散歲蕤蕙草密預籍芳筵賞

沾生信昭悉紀功曹晏紫葵窗外舒青荷池上出既

闔潁川扇且卧淮南秩府君流風蕩晚陰行雲掩

朝日念此蘭蕙客徒有芳菲質何從事

侍筵西堂落日望鄉

沉病已綿緒一作綿負官別鄉憂高城淒夕吹時

見國煙浮曹丞漠漠輕雲晚颯颯高樹秋鄉山不

可望蘭卮且獻酬府君旻高識氣迫泉停知潦收

幸遇慶延一作筵渥方且一作將沐恩猷功曹晏芸黃

先露早騷瑟一作骨驚暮秋舊城望已肅况乃客

悠悠何從事

祀敬亭山春雨

水府衆靈出石室寶圖開白雲帝鄉下行雨巫

山來府君歌風讚靈德舞蹈起輕埃高軒乍留吹

玄羽或徘徊何從事福降群仙下識逸百神該青

鳥飛層隙赤鯉泳瀾隈齊舉

往敬亭路中



山中芳杜綠江南蓮葉紫芳年不共遊淹留空  
若是君府綠水豐漣漪青山多繡綺新條日向抽  
落花紛已委何從弱蔓旣青翠輕莎方霍霍鷺  
鳴沒而遊麝麝騰復倚齊舉春岼望沉沉清流  
見瀾瀾幸籍人外遊盤桓未能徙陳駑把瓊  
芳隨山訪靈詭榮楯每嶙峋林堂多碣礧府君

謝宣城集卷五終



程